

**Siunissami pisariaqartitsinerup qulakkeerneqarnissaa siunertaralugu Ilisimatusarfimmi ilinniarfeqarfiup illutaatalu annertusineqarneranni aningaasaqarnikkut allaffissornikkullu kingunerisassat misissorneqarnerannik imaqartumik nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaammut atatillugu sukumiisumik misissorneqassaaq, danskit nunanilu allani aningaasaateqarfiit assigisaallu aningaasalersorneranut akuutinneqarsinnaanersut. Nassuiaat Inatsisartunut agguanneqassaaq 1. januar 2027 nallertinnagu.**

*Demokratiit Inatsisartunut ilaasortaataannit saqqummiunneqartoq*

### **pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**siunnersuutip aappassaaneerpeqarneranut**

### **ISUMALIUTISSIISSUTAA**

Ataatsimiititaliap suliarinninnermini inuttarai:

Inatsisartunut ilaasortaq Nivi Heilmann Efraimssen, Inuit Ataqatigiit, siulittaasoq  
Inatsisartunut ilaasortaq Isak Johannessen, Naleraq, siulittaasup tullia  
Inatsisartunut ilaasortaq Margrethe Thårup Andersen, Demokratiit  
Inatsisartunut ilaasortaq Karen-Marie Kyed Frederiksen, Demokratiit  
Inatsisartunut ilaasortaq Nivi Rosing, Inuit Ataqatigiit

UPA2026-mi ulloq 23. april 2026 siullermeerinerup kingorna ataatsimiititaliap siunnersuut misissorpaa.

### **Siunnersuutip imarisaa siunertaalu**

Ilisimatusarfimmi campusip annertusineqarnerani aningaasaqarnikkut allaffissornikkullu kingunerisassanik qulaajaasumik Naalakkersuisut nassuiaasiornissamut peqquneqarnissaat siunnersuummi siunertarinqarpoq. Tamatuma peqatigisaanik allilerinissap aningaasalersorneqarnissaa pillugu aningaasaateqarfiit akuutinneqarnissaannut periarfissat misissorneqarnissaanik siunnersuutip akuerineqarneratigut Naalakkersuisut peqquneqassapput.

Nassuiaat Inatsisartunut kingusinnerpaamik 1. januar 2027-mi agguanneqassasoq

siunnersuuteqartup siunnersuutigaa.

### **Siunnersuutip Inatsisartunit siullermeerneqarnera**

Siunnersuut siullermeerneqarami partiinit tamanit Naalackersuisunillu taperserneqarpoq. Ilisimatusarfiup illutaasa allilerneqarnissaat pingaaruteqartut isumaqataaffigilluarneqarpoq, tamatumunngalu tunngaviupput ilinniartup inissaaleqiffiunera aammalu tamanna pillugu illunik attartornermut aningaasartuutit qaffasinnerat.

Atortussat suliniummut “Uppik”-mut atorneqartut pioreersut atorneqarnissaat assorsuaq soqutigineqarpoq. Kiisalu ilinniartut ineqarfiinik pisariaqartitsineq erseqqissaatigineqarpoq, tamatumani ilinniartut ineqartinniarneqarneranni unammilligassat Ilisimatusarfiup allilerneqarnissaanut atatillugu aamma ilanngullugit eqqarsaatigineqartariaqartut.

### **Siunnersuutip aningaasaqarnikkut kingunerisassai**

Siunnersuut akuerineqarpat Ilisimatusarfiup illutaasalu allilerneqarnissaanni aningaasaqarnikkut kingunerisassat Naalackersuisunit qulaajarneqassapput aammalu allilerinerup aningaasalersorneqarnissaanni aningaasaateqarfinnik akuutitsinissamut periarfissat misissorneqassallutik.

### **Ataatsimiititaliap siunnersuummut oqaaseqaatai**

Nunatsinni ataqatigiissakkamik pisariaqartitallu aallaavigalugit ilinniartitaanikkut periusissiamik aaqqissuussinissamut ilisimatuussutsikkut tunngavilersuutit aallaavigalugit ilinniarneq pillugu politikikkut aalajangiisoqartarnissaa pisariaqartoq ataatsimiititaliamit nalilerneqarpoq, tak. aamma immikkoortoq 75-ip suliarineqarnera. Ilinniartitaanermut immikkoortortap iluani piginnaasanik ineriartortitsinerit aningaasaleeriaatsillu pitsaassutsimut annertussutsinullu tunngasunik misissueqqissaarnerit, nuna tamakkerlugu piginnaasatigut pisariaqartitanik ersersitsisut, tunngavigalugit aammattaaq suliarineqartariaqarput.

Ilisimatusarfiup ukiuni 20-ni tulliuttuni 20 %-imik allisimanissaa eqqoriaalluni missiliugaq tunngavigalugu naatsorsuutigineqartoq nalunaarutigineqarsimanera ataatsimiititaliamit naammaginangitsutut isigineqarpoq. Misissueqqissaarnivimmik ingerlatsisoqarsimanngilaq, eqqoriaasimanerlu eqqoqqissaanngitsutut illuni, tassami suliffeqarfiit akornanni piginnaasatigut pisariaqartinneqartut suunersut qulaajarneqarsimanngillat nalilersuinerimullu ilaatinneqarnatik. Taarsiullugu siunissaq qaninnerusq ungasinnerusorlu eqqarsaatigalugit Nunatta piginnaasatigut pisariaqartitaanik misissueqqissaarnermik suliaqartoqartariaqaralarpoq – tassunga ilanngullugit inatsisilerinerimut, inuussutissarsiutitigut aningaasaqarnermut tunngasut il. il. – tassani siunertarineqarluni suliffeqarfiit pisariaqartitaannut naapertuuttumik ilinniarfissanik neqeroorteqartarnissamut aaqqissuussinissaq. Taamatut ataqatigiissarluakkamik aaqqissuusseriaaseq Kalaallit Nunaanni suli tamakkiisumik ineriartortinneqarsimanngitsoq ataatsimiititaliamit maluginiarneqarpoq,

aammalu ilinniartitaanerup iluani neqeroorutaasartut piumaneqarnerusullu tamakkiisumik naapertuutilersinneqarnissaannut suliaq sivilissasoq.

Ataatsimiititaliamit isumaqataaffigineqarpoq ilinniartut ineqartinniarneqarneranni unammilligassat Ilimmarfiup allilerneqarnissaanut atatillugu aamma ilanngullugit eqqarsaatigineqartariaqartut, siunissami inissaqarniarnikkut unammilligassanik aallarteqqittoqannginnerussammat.

**Ataatsimiititaliap inassuteqaatai**

- Ataatsimiititaliami amerlanerussutillit, Demokraatineersut aamma Inuit Ataqatigiinneersut, allannguutissatut siunnersuut tulliuuttoq akuerisassanngorlugu inassuteqaatigaat:

”Siunissami suliffeqarnermi ilinniartitaanikkut pisariaqartitsinissaq matussuserniarlugu Ilimmarfimmi ilinniarfeqarfiup illutaasalu allilerneqarneranni aningaasaqarnikkut allaffissornikkullu kingunerisassat qulaajaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Allilerinerup, ilinniartut ineqarfiinut meeqqerivinnullu aaqqiissutissat piviusunngortinneqarnissaannut aammalu aningaasaateqarfiit aqputigalugit aningaasalersuinissamut periarfissat pillugit kaammattuutininik nassuiaat imaqaassaaq. Uppik pillugu suliniummit atortut nassuiaammut ilanngunneqassapput nassuiaallu Inatsisartunut kingusinnerpaamik ulloq 1. januar 2027-mi agguanneqassaaq.”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Nivi Heilmann Efraimsen  
Siulittaasoq

---

Isak Johannessen  
Siulittaasup tullia

---

Margrethe Thårup Andersen

---

Karen-Marie Kyed  
Frederiksen

---

Nivi Rosing